



BCTL LIDERA PROMOSAUN INVESTIMENTU IHA SINGAPURA ATU AVANSA SETÓR FINANSEIRU TIMOR-LESTE NIAN

Governadór Banco Central de Timor-Leste (BCTL), Señor Hélder Lopes, lidera delegasaun ba Singapura husi 19 to'o 23 Agostu 2024, atu hasoru malu ho homólogu rejionál sira no promove liután investimentu iha setór finanseiru Timor-Leste nian.

Iha loron 19 Agostu 2024, delegasaun hasoru ekipa Bloomberg atu hametin liután lasu kooperasaun no esplora poténsia kriasaun instrumentu merkadu finanseiru iha Timor-Leste. Iha loron henesan, delegasaun mos iha enkontru ho *Bank of International Settlements Innovation Hub (BISIH)*, diskute dezenvolvimentu infrastrutura sistema pagamentu Timor-Leste nian no nia potensiál integrasaun pagamentu rejionál iha futuru.

Iha loron tuir-mai, Banco Sentral asina akórdu kooperasaun ho *International Finance Corporation (IFC)* atu estabelese Institutu Banku Sentral. Inisiativa ida-ne'e ho objetivu atu promove ekosistema sustentavél ba dezenvolvimentu habilidade kontínuu iha setór finanseiru Timor-Leste nian.

Iha loron 21 Agostu, BCTL, kollabora hamutuk ho IFC no TradeInvest, organiza webinar hodi apresenta oportunidade investimentu iha Setór Finanseiru Timor-Leste nian. Eventu ne'e ho propózitu atu apresenta regulamentu foun ba kompaña finanseira (entidade finanseira naun-depozitária) ba potensias investidór sira. Hafoin webinár ida-ne'e, tuir kendas ho enkontru kortézia ho Señor Chia Der Jiun, Diretor Ezekutivu Autoridade Monetária Singapura (MAS) ne'ebé permite partilla hanoin kona-ba situsaun ekonómika NASAUN ida-idak nian no diskusaun kona-ba preparasaun adezaun Timor-Leste ba ASEAN. Iha okaziaun ida ne'e mós, BCTL mos husu orientasaun no kapasitasau hosi MAS atu prepara setór finanseiru Timor-Leste ba adezaun ba ASEAN.

Reuniaun kontinua iha loron 22 Agostu iha Embaixada Timor-Leste iha Singapura, ne'ebé delegasaun apresenta potensiál oportunidade investimentu iha setór finanseiru Timor-Leste nian ba investidór Singapura nian ne'ebé interesa atu investe iha iha setór Seguru no Mikrofinansa. Hafoin reuniaun ne'e, delegasaun iha sorumutu ho reprezentante *hosi Oversea-Chinese Banking Corporation Limited (OCBC)*, banku bo'ot daruak iha Sudeste Aziátiku ein-termus ativus, ho objetivu kria relasaun, esplora poténsia oportunidade investimentu no aprende estratéjia jestaun fundu sira. Aleinde-ne'e, delegasaun mos iha oportunidade hasoru malu ho Diretor Ezekutivu GIC, Señor Lim Chow Kiat, atu aprende sira nia perspetiva no esperénsia estratéjia no práтика investimentu fundu soberanu.

Vizita traballu ne'e remata iha loron 23 Agostu, ho ekipa BCTL hasoru malu ho investidór Singapura nian ne'ebé interesa atu estabelese banku komersiál iha Timor-Leste, espesifikamente responde ba segmentu merkadu ne'ebé iha lakuna. Aleinde-ne'e, delegasaun mos iha sorumutu ho *Principal Financial Services (PFS)*, partilla sira nia esperénsia investimentu iha ativus iha NASAUN oioin no diskute oportunidade treinamentu ba cliente sira no cliente potensiál sira.